



Sud Bosne i Hercegovine
Sud Bosne i Hercegovine

Broj: S1 3 IŽ 038389 20 IŽ
Sarajevo, 30.10.2020. godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Vesne Trifunović kao predsjednika vijeća, Mirsade Džindo i Srete Crnjaka kao članova vijeća, odlučujući o žalbi Slobodana Škiljića, Via Giulio Natta 12, 36100 Vicenza, Italija, izjavljenoj protiv odluke Centralne izborne komisije Bosne i Hercegovine, broj: 05-1-07-1-997/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na nejavnoj sjednici održanoj dana 30.10.2020. godine donio je ovo:

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđen je i objavljen broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na kojem spisku se nalazi i žalitelj.

Protiv ove odluke žalitelj je blagovremeno uložio žalbu u kojoj ističe da je pogrešno naveden na listi glasača iz inostranstva, iz Srbije, jer živi u Italiji na adresi Via Giulio Natta 12, 36100 Vicenza, Italija.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena ili odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da je žalba neosnovana.

Prema stanju u spisu, Centralna izborna komisija BiH (CIK BiH) je, prije donošenja ožalbene odluke, a prilikom razmatranja prijave dostavljene dana 27.08.2020. godine na ime žalitelja Slobodana Škiljića, utvrdila da je dostavljen obrazac prijave za glasanje izvan BiH za imenovanog, uz koji je dostavljena i kopija njegovog važećeg pasoša. S obzirom da je prijava za glasanje izvan BiH ispunjavala sve uslove propisane odredbom člana 3.15 Izbornog zakona BiH, žalitelj se nalazi na izvodu iz Centralnog biračkog spiska za glasanje izvan BiH iz Srbije.

Imajući u vidu da je navedena žalba dostavljena putem e-maila, da ista nije potpisana i da žalitelj nije dostavio niti jedan dokaz kojim bi potkrijepio navode iz žalbe, Centralna izborna komisija BiH je zaključila da se radi o zloupotrebama biračkog prava, te da žalba nije osnovana.

Naime, u konkretnoj situaciji nesumnjivo se radi o zloupotrebi biračkog prava, međutim, Centralna izborna komisija BiH na osnovu raspoloživih činjenica nije bila u mogućnosti utvrditi ko je počinio zloupotrebu biračkog prava za glasanje izvan BiH, jer je zloupotreba mogla biti učinjena, kako od strane žalitelja, tako i od strane trećih lica. Međutim, u svakom slučaju žalitelj će biti u mogućnosti da iskoristi svoje biračko pravo i da po želji glasa na svom redovnom biračkom mjestu u Opštini Teslić, u Republici Srpskoj.

Naime, žalitelj će, ukoliko na dan Lokalnih izbora 2020. godine, dođe na redovno biračko mjesto određeno prema njenom mjestu prebivališta, biti omogućeno da glasa nepotvrđenim kovertiranim glasačkim listićima (član 5.18 Izbornog zakona BiH) koji će biti potvrđeni i prebrojani u Glavnom centru za brojanje, s tim što će Centralna izborna komisija BiH u Glavnom centru za brojanje izuzeti glasački materijal dostavljen eventualno i iz inostranstva na ime žalitelja i isti neće biti ponovo prebrojan, a sve u cilju sprečavanja zloupotreba biračkog prava i omogućavanja ostvarivanja biračkog prava biračima kojima ono zaista pripada.

Prema odredbi člana 5.18 Izbornog zakona BiH, ako se ime birača ne nalazi na izvodu iz Centralnog biračkog spiska zato što se birač upisao u Centralni birački spisak da glasa izvan zemlje, a vratio se da glasa lično u Bosni i Hercegovini, njegovo ime dodaje se na poseban obrazac koji sadrži sve podatke kao i izvod iz Centralnog biračkog spiska. Birač se potpisuje na izvod i ima pravo glasati nepotvrđenim-kovertiranim glasačkim listićem, u skladu sa odredbama ovog zakona.

S obzirom na navedeno apelaciono vijeće je ocijenilo da se pobijanom odlukom Centralne izborne komisije BiH ne povređuje biračko pravo žalitelja.

Iz navedenih razloga apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o

upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA
S U D I J A

Vesna Trifunović